

Cov Lus Lees Kevntseeg Rawqli  
Vajtswv Txojlus Nyobhauv Lub Nroog  
Ovxanpawm Uas Tsis Tau Hloov

Xyoo 1530

Txhais Ua Lus Mekas thiab Muab Keebkwm

Los Ntawm

Glen L. Thompson

**Tus Txhais Ua Lus Hmoob:** *Npliajsoob Lauj*

**NORTHWESTERN PUBLISHING HOUSE**  
Milwaukee, Wisconsin

## • Txheejtxheem •

<b>Tham Txog Keebkwm</b> .....	v
<b>Luscoj</b> .....	1
<b>Tej Nqelus Ntawm Cov Lus Ntseeg</b> .....	4
Nqelus 1: Hais Txog Vajtswv .....	4
Nqelus 2: Hais Txog Kevtxhaum Nruab-thiab (Kevtxhaum Ntawm Roj Ntsha) .....	4
Nqelus 3: Hais Txog Vajtswv Leejtub .....	4
Nqelus 4: Hais Txog Qhov Uas Vajtswv Ua Kom Peb Dawbhuv .....	5
Nqelus 5: Hais Txog Tswv Yexus Tes Haujlwm .....	5
Nqelus 6: Hais Txog Qhov Kev Mlooglus Tshiab .....	5
Nqelus 7: Hais Txog Pawgntseeg .....	6
Nqelus 8: Hais Txog Pawgntseeg Yog Dabtsi .....	6
Nqelus 9: Hais Txog Kev Ua Npavtivxamas (Kevcai Ntxuav).....	6
Nqelus 10: Hais Txog Tswv Yexus Pluashmo .....	7
Nqelus 11: Hais Txog Kev Leestxim Ntawm Tus Ntseeg Lub Neej Txhua Hnub .....	7
Nqelus 12: Hais Txog Kev Leestxim thiab Kev Hloov Dua Siab Tshiab .....	7
Nqelus 13: Hais Txog Tej Kevcai Dawbhuv .....	7
Nqelus 14: Hais Txog Pawgntseeg Kev Tsocai .....	8
Nqelus 15: Hais Txog Tej Uas Pawgntseeg Ibtxwm Coj .....	8
Nqelus 16: Hais Txog Kev Nomtswv .....	8
Nqelus 17: Hais Txog Yexus Rovlos Txiavtxim .....	9
Nqelus 18: Hais Txog Qhov Neeg Muaj Peevtxwm Xaiv thiab Tsis Xaiv .....	9
Nqelus 19: Hais Txog Qhov Txoj Kevtxhaum Ua Kom Tshwm Muaj .....	10
Nqelus 20: Hais Txog Tes Haujlwm Zoo .....	10
Nqelus 21: Hais Txog Hwm thiab Qhuas Cov Ntseeg Zoo Uas Tuag Lawm .....	13
<b>Sibtham Txog Tej Qhov Yuamkev Uas Peb Tau Muab Kho Lawm</b> .....	17
Nqelus 22: Hais Txog Ob Qho Kevcai Dawbhuv .....	14
Nqelus 23: Hais Txog Kev Tsis Yuav Pojniam Ntawm Cov Xibfwb Txivplig .....	15
Nqelus 24: Hais Txog Tswv Yexus Pluashmo ( <i>The Mass</i> ) .....	16
Nqelus 25: Hais Txog Kev Leestxim thiab Kev Zamtxim .....	19
Nqelus 26: Hais Txog Teeb Tej Cai Los Tswj Kev Noj Tej Yam Zaubmov .....	20
Nqelus 27: Hais Txog Kev Coglus Ntawm Cov Haujsam Txivplig .....	24
Nqelus 28: Hais Txog Cov Xibfwb Lub Hwjchim .....	28
<b>Xaus</b> .....	36

## • Tham Txog Keebkwm •

Luvtaws tau kawm txog Vajtswv Txojlus tau ntau xyoo los txog rau xyoo 1517 thiaj ua rau nws pom txog Vajtswv txoj kevhlub meej. Luvtaws thiaj pom tau hais tias neegtxhaum tsuas yog dim los ntawm Vajtswv txoj kevhlub uas yog los ntawm Tswv Yexus lub neej dawbhuv thiab Nws tuag theej peb saum ntoo khaublig xwb.

Thaum Luvtaws kawm paub txog qhov no lawm, nws thiaj pom txog tej kevqhia cuav uas cov Katauliv qhia. Vim cov Katauliv qhov kevqhia cuav uas hais txog kev leestxim thiab kev zamtxim thiaj ua rau Luvtaws sau nws cuajcaum tsib (95) nqelus. Lub sijhawm tau dhau zuzus, Luvtaws thiaj li pib muaj lub siab tawv hais txog yuav kho dua kevntseeg. Nyobrau xyoo 1521 Luvtaws thiaj tau raug ntiab tawm hauv cov Katauliv. Nyobrau xyoo ntawd, Luvtaws tau plam qhov uas nws yog pejxeem hauv lub tebchaws Loos vim qhov uas nws tivthaiv Vajtswv Txojlus.

Txawm li ntawd los xij, Luvtaws qhov kevqhia pib nthuav dav zuzus mus rau sab Yublaum (*Europe*). Tus vajntxwv tau siv zog uas kom cov pawgntseeg Katauliv rovlos sibkoom uake, vim tus vajntxwv txhawj hais tias yog cov pawgntseeg tsis los koom siab uake, cov tubrog ntawm lub tebchaws Thawskis (*Turky*) uas feemcoob yog cov ntseeg Muvxalees (*Muslims*) yuav tuaj txeeb lub tebchaws Auvxatias (*Austria*) thiab yuav txeeb kom tau sab Yublaum (*Europe*). Tus vajntxwv paub hais tias nws cov tubrog yuav kov tsis yeej cov tubrog Thawskis yog hais tias cov pawgntseeg tsis sib koomsiab.

Nyobrau xyoo 1530, zaum kawg uas tus vajntxwv Tshaus 5 (*Charles V*) tau ua kom cov uas caum Luvtaws lawm thiab cov pawgntseeg Katauliv rovlos koomsiab uake. Tus vajntxwv tau kom cov Luvtawslees tuaj koom lub rooj sablaj nyobrau lub nroog Ovxanpawm hauv Yelamas qabteb. Thaum no cov thawjcoj hauv cov Katauliv tseem suav hais tias Luvtaws yog tus qhia cuav, yog lino nws thiaj tuaj koom tsis tau lub rooj sablaj no. Tiamsis tus Filiv Melathoos (*Philip Melanchthon*) tau sawv Luvtaws cev thiab sawv ntawm Luvtaws qhov kevqhia tuaj mus koom.

Ib tug thawj nyobhauv lub nroog Xevxaunis (*Saxony*) ua tus sau cov lus qhib thawj, Melathoos (*Melanchthon*) ua tus sau cov lus lees kevntseeg uas hais nyobrau hauv lub nroog Ovxanpawm (*Augsburg*), uas yog sau rawsli Luvtaws tej ntaub ntawv thiab cov uas caum Luvtaws qab tej ntaub ntawv. Thawj 21 nqelus uantej yog hais txog cov Luvtawslees li txoj kevntseeg thiab kevqhia. Muaj xya nqelus yog hais txog tej kevqhia cuav uas cov Luvtawslees tau muab kho kom raug.

Tomqab tau sibtham ntau zaus lawm, muaj xya tus thawj thiab xya tus sawvcev ntawm cov Luvtawslees nyobrau ob lub nroog hauv tebchaws Yelamas (*German*) tau txiavtximsiab hais tias cov lus lees kevntseeg nyobhauv lub nroog Ovxanpawm (*Augsburg*) yog cov lus tseeb uas qhia txog thiab hais txog lawv txoj kevntseeg. Cov thawjcoj thiab cov sawvcev thiaj li tau kosnpe ua timkhawv hais tias cov lus lees kevntseeg no yog cov hais tseeb lawm. Cov thawjcoj thiab cov sawvcev no yog;

Ntsuas (*John*), Ntsauj (*George*), Awsnev (*Ernest*), Fasxiv (*Francis*), Filiv (*Philip*), Ntsuas Fesdawliv (*John Federick*), thiab Vausnkias (*Wolfgang*).

Cov lus lees kevntseeg rawsli Vajtswv Txojlus uas nyobhauv lub nroog Ovxanpawm (*Augsburg*) no yog tau muab sau ua lus Yelamas thiab lus Latees (phau uas peb txhais no yog txhais los ntawm phau sau ua lus Latees). Phau uas sau ua lus Yelamas tau muab nyeem rauhauv lub rooj sablaj loj nyobhauv lub nroog Ovxanpawm (*Augsburg*) tim 25 lub 6 hli, xyoo 1530. Qhov no ua rau cov Katauliv tsis leesyuaav cov lus lees kevntseeg no, thiab lawv tau sau ib cov lus ntau heev tawmtsam txog qhov no. Yog lino, Melathoos (*Melanchthon*) thiaj sau tau ib cov lus ntau heev los tivthaiv cov lus lees kevntseeg uas rawsli Vajtswv Txojlus no nyobhauv lub nroog Ovxanpawm no. Cov lus tivthaiv kevntseeg no tau muab cob rau tus vajntxwv nyobrau lub 9 Hli xyoo 1530.

Tiamsis tau ntau xyoo tomqab no, Melathoos (*Melanchthon*) tau muab cov lus lees kevntseeg uas rawsli Vajtswv Txojlus uas tau sau nyobhauv lub nroog Ovxanpawm no pauv ntau yam heev, tshwjxeeb yog qhov kevqhia uas hais txog Tswv Yexus Pluashmo. Tomqab Luvtaws tuag lawm, tej kevntseeg uas tau muab pauv losis hloov no tau tsim kev kubntxhov thiab kev tsis sibhaumxeeb ntau yam nyobrau ntawm cov neeg uas caum Luvtaws qab. Nyobrau xyoo 1580, cov lus lees kevntseeg nyobhauv lub nroog Ovxanpawm uas tsis tau raug muab hloov, thiab cov lus uas sau los tivthaiv cov lus lees kevntseeg uas nyobhauv lub nroog Ovxanpawm no thiaj raug muab cojlos tso rauhauv phauntawv uas hais txog cov Luvtawslees txoj kevntseeg (*The Book of Concord*). Phau uas peb muab txhais no yog hais rawsli F. Npetes thiab W.H.T. Daus (*F. Bente and W. H. T. Dau*), phau uas luam ntawm nyobrau xyoo 1921. Phau uas peb muab kho dua tshiab no yog peb siv cov lus kom yoojyim rau cov pawgntseeg nkagsiab thiab coj mus siv.

Niajhnuv no, yog cov xibfwb Luvtawslees thiab cov kwsqhia ntawv hauv Luvtawslees yuav los ua haujlwm, lawv yuavtsum tau coglus hais tias lawv yuav qhia rawsli Vajtswv Txojlus uas tau hais tseg thiab qhia tseg nyobrau hauv cov Luvtawslees phauntawv uas hais txog Luvtawslees txoj kevntseeg (*Book of Concord*) thiab phau uas hais txog cov lus lees kevntseeg rawsli Vajtswv Txojlus uas sau nyobhauv lub nroog Ovxanpawm no.

**Cov Lus Lees Kevntseeg Rawsli Vajtswv Txojlus Uas Nyobhauv Lub Nroog  
Ovvanpawm Xyoo 1530**

Phau Kawm

**Cov Lus Qhibhawj Uas Xa Mus Rau Tus Vajntxwv Tshaus 5 (*Emperor Charles V*)**

**1]** Hwm txog vajntxwv Xisxas tus uas muaj hwjchim thiab muaj kevhlub. Koj tau hais kom lub tebchaws muaj kev sablaj nyobrau hauv lub nroog Ovvanpawm no thiab kom sibtham hais tias yuav tawmtsam cov tubrog Thawskis licas vim lawv yog ib cov neeg uas tsivtsaim thiab lawv yog cov uas ntxub cov ntseeg thiab txoj kevntseeg los ntev heev lawm. Koj xav kom peb pomzoo muaj kev siv tubrog sibtau sibtua thiab ntaus kom yeej lawv tej kev tawmtsam. **2]** Dhau lino, koj kuj kom peb sibtham thiab muaj kev sibhaumxeeb thiab sib koomsiab txog peb txoj kevntseeg uas dawbhuv uas yog cov ntseeg txoj kevntseeg. Koj xav kom peb tuaj nyob uake sibtham thiab muaj kev tawm tswvyim thiab ib leeg mloog ib leeg hais txog qhov uas kevntseeg sibtxawv ntawd.

**3]** Koj xav kom peb sibtham thiab sojntsuam tej teebmeem no los ntawm peb tuskheej thiab los ntawm txoj kevhlub thiab muaj lub siab mos muag. Thiab koj xav kom peb kho thiab daws tej uas ib leeg nkagsiab txawv lawm ib yam no los ntawm ob tog muab sau cia rauhauv ntaub ntawv. Yog ua lino, cov ntseeg thiaj yuav muaj kev nkagsiab txog qhovtseeb. **4]** Cov ntseeg thiaj yuav leestxais thiab yuav tuav tau qhov kevntseeg tseeb lawm yav pemsuab. Peb txhua tus yeej nyob hauvqab tib tug Yexus Khetos xwb. Peb tsimnyog nyob koom ua ib lub siab thiab koom tau tib txoj kevntseeg.

**5]** Peb cov uas kosnpe rauhauv cov lus no yog; cov uas muaj cai xaiv vajntxwv, cov tub fuabtais, thiab lwm tus thawjcoj uas koom nrog peb uas tau raug hu tuaj koom lub rooj sablaj no zoo ibyam li lwm pab cov uas muaj cai xaiv vajntxwv, cov tub fuabtais thiab cov thawjcoj. Peb tau mloog thiab yuav koj ua vajntxwv cov lus thiab tuaj rau lub nroog Ovvanpawm no tuaj sablaj. Peb tsis yog yuav khav, tiamsis peb yog cov uas xub xub tuaj txog.

**6]** Hais txog tej teebmeem thiab lwm yam uas koj ua vajntxwv tau hais rau kom cov muaj cai xaiv vajntxwv, cov tub fuabtais thiab cov thawjcoj ntawm txhua lub tebchaws uas koj kav, koj tej teebmeem tuaj sibtham nyobrau hauv lub nroog Ovvanpawm no: Cov thawjcoj ntawm cov tebchaws yuav ua rawsli koj ua vajntxwv tsab cai hais tias peb txhua tus yuavtsum sau peb txhua tus tej kev sibtham thiab kev pomzoo ua lus Yelamas thiab lus Latees xa tuaj rau koj. **7]** Nyobrau thawj hnuv, tomqab peb tau sojntsuam thiab xav zoo zoo lawm, peb tau hais rau koj ua vajntxwv hais tias peb yuav xa cov lus lees kevntseeg uas yog ntawm peb sab tuaj rau koj hnuv puav tomntej no. Yog lino, peb thiaj ua rawsli peb cov lus uas tau hais rau koj ua vajntxwv ntawd lawm hais txog cov teebmeem ntawm txoj kevntseeg no.

**8]** Yog lino, peb thiaj xa peb cov lus lees kevtseeg rawsli Vajtswv Txojlus ntawm peb cov xibfwb thiab peb tuskheej tuaj rau koj ua vajntxwv. Qhov no yuav qhia tau rau koj ua vajntxwv hais tias peb ntseeg licas thiab qhia licas nyobrau hauv Vajtswv Txojlus Uas Dawbhuv nyobrau ntawm peb lub tebchaws, peb tej chaw, peb tej nroog, thiab peb tej tuamtsev.

**9]** Lwm tus uas muaj cai xaiv vajntxwv, lwm tus uas yog cov tub fuabtais, thiab lwm cov thawjcoj uas tsis yog peb cov, yog lawv xav ua rawsli koj ua vajntxwv tsab cai uas tau hais los saum no los lawv mam li sau lawv tej lus hais txog lawv li kevtseeg ua lus Latees thiab lus Yelamas xa tuaj rau koj ua vajntswv. **10]** Yog li ntawd, peb thiab peb cov tub fuabtais, thiab tej phoojywg uas tau sau npe los saum no, peb yuav muaj kev sibtham nrog koj uas yog peb tus vajntxwv, uas yog tus tswv muaj siab hlub. Peb mam tham txog txhua txojkev uas yuav pab kom seb peb puas koom tau ua ibke, tiamsis qhov no yuavtsum tham los ntawm txojkev sibhwm. Tomqab ob tog muab tej teebmeem no tham tag lawm, yog tsis muaj kev sib covnyom dabtsi, thov kom Vajtswv mam muab tej teebmeem no xaus, thiab xav kom txhua tus pomzoo nrog tib txog kevtseeg tseeb.

**11]** Nws zoo tibyam li peb txhua tus nyob hauvqab tib tug Khetos, peb yuavtau lees txoj kevtseeg uas hais txog tib tug Khetos ntawd, thiab pomzoo ua rawsli koj uas yog vajntxwv tsab cai, uas yog qhov peb txhua tus yuavtsum pomzoo thiab tuav Vajtswv Txojlus tseeb. Peb thov Vajtswv kom Nws pab ua qhov no rau peb sawvdaws.

**12]** Zaum no peb ho yuav hais txog lwm tus uas yog cov muaj cai xaiv vajntxwv, lwm tus uas yog tub fuabtais, thiab lwm tus uas yog thawjcoj uas tsis yog tuaj peb tog. Koj uas vajntxwv tau tawm tsab cai hais tias kom ob tog muab tej lus sau rauhauv ntaub ntawm thiab ob tog cojlos sibtham. Tiamsis yog lawv tsis ua li koj tsab cai, losis peb ho sibtham tsis sibhaum txog tej teebmeem kevtseeg no, **13]** peb thov kom koj ua vajntxwv nkagsiab hais tias peb yeej ua txhua yam kom cov ntseeg nyob tau uake. Thiab peb tseem yuav ua li ntawd ntxiv mus yog hais tias Vajtswv pomzoo thiab yog qhov ntawd tsis ua rau peb lub siab txhaum. **14]** Koj tus uas yog vajntxwv thiab lwm tus uas yog cov muaj cai xaiv vajntxwv thiab tej thawjcoj ntawm txhua lub tebchaws uas koj kav no, thiab txhua txhua tus uas muaj txoj kevhlub tseeb thiab xav muaj txoj kevtseeg tseeb yuav tig pobntseg mloog txog qhov teebmeem no, thiab yuav pom thiab nkagsiab txog peb qhov kevtseeg thiab tej lus ntseeg uas peb lees rawsli hauv Vajtswv Txojlus tseeb.

**15-16]** Vajntxwv tus uas muaj meejmom siab, muaj ntau zaus koj tau hais rau cov neeg uas muaj cai xaiv vajntxwv, cov tub fuabtais, thiab tej thawjcoj ntawm txhua lub tebchaws uas koj kav no hais tias, kom thaum lawv daws tej teebmeem hais txog kevtseeg, koj yuav tsis ua tus los txiavtximsiab rau tej no los ntawm koj tuskheej. Koj hais lino nyobrau hauv koj tej kevcai, thiab koj hais nyobrau lub rooj sablaj nyobrau lub nroog Xapaiyaws (*Speyer*) xyoo 1526 A.D. Twb yog vim lino, koj thiaj kom cov neeg Loos tus thawj txivplig hu kom muaj kev sablaj xwb.

**17]** Koj kuj tau tshajtawm rau pejxeem meej meej ib xyoo dhau los no nyobrau lub rooj sablaj hauv lub nroog Xapaiyaws hais txog qhov saum no ibyam. **18]** Tus fuabtais Fawsdines ntawm lub tebchaws Npauhemies thiab lub tebchaws Hankaslis uas yog peb tus phoojywg thiab tus tswv uas muaj lub siab hlub. Dhau lino, kuj muaj cov nomtswv thiab cov sawvcev tau hais rau lwm pab pawg hais tias koj uas yog vajntxwv tau pomzoo thiab txiavtximsiab kom koj tus sawvcev uas nyobrau cov tebchaws uas koj kav no, thiab nrog rau tus thawj tsavxwm thiab cov tuamxam, thiab cov sawvcev uas yog nyobrau lwm tus nom kav tuaj sibsau uake thiab sablaj nyobrau lub nroog Lisntse-xanpawm (*Regensburg*). **19]** Thiab koj ua vajntxwv kuj xav hais tias qhov kev sablaj no yog ib qhov tsimnyog lawm. **20]** Vim rauqhov tej teebmeem uas koj ua vajntxwv muaj nrog tus thawj txivplig ntawd twb yuav xaus mus rau qhov zoo thiab twb yuav ua rau kom cov ntseeg rovlos sib koomsiab uake dua. Yog li ntawd, koj ua vajntxwv thiaj li tau coglus hais tias koj los kuj pomzoo li tus thawj txivplig hais uas yog kom muaj lub rooj sablaj ntawm cov ntseeg tej thawjcoj, thiab koj mam ua tus xa ntawv mus ceebtoom rau sawvdaws sai li sai tau.

**21]** Yog hais tias qhov teebmeem hais txog kevntseeg sibtxawv no tsis muaj peevxwm kho tau thiab daws tau los ntawm kev thajyeeb thiab kevhlub timntsej timmuag ntawm koj ua vajntxwv, peb yuav pomzoo ua li cov lus yuav hais no: Qhov uas peb yuav ua ntxiv rau tej uas peb twb ua dhau los lawm, peb yuav tuaj tivthaiv peb qhov kevntseeg nyobrau lub rooj sablaj ntawm cov ntseeg no. Txhua lub rooj sablaj uas tau muaj thaum koj tseem ua vajntxwv kav no, cov uas muaj cai xaiv vajntxwv, cov tub fuabtais, thiab lwm tus thawjcoj ntawm txhua lub tebchaws uas koj kav no tau tawmsuab pomzoo kom muaj rooj sablaj ntawm cov thawjcoj ntseeg. **22]** Yav dhau los peb twb tau hais lawm hais tias kom muaj lub rooj sablaj no timntsej timmuag ntawm koj ua vajntxwv kom los kho thiab daws txog tej teebmeem ntawm txoj kevntseeg no. **23]** Peb tseem tuav peb lolus qub uas yog yuavtsum muaj rooj sablaj thiab peb xav vamkhom koj uas yog vajntxwv txhawb peb. Vim peb yuav ciali tso tseg qhov uas peb ntseeg thiab peb tivthaiv no tsis tau, tshwj yog hais tias peb thiab pab uas tsis pomzoo nrog peb ntawd los sibkho tej teebmeem no los ntawm txojkev phoojywg, thiab kho kom tej kev tsis sibhaum ntawd dhau mus kom txojkev thajyeej ntawm cov ntseeg rovlos muaj zoo li qub rawsli koj tsab cai uas koj tau tawm hais kom cov ntseeg sibkho. **24]** Peb ua timkhawv thiab coglus timntsej timmuag rau peb cov lus no.

#### **Tej Yam Tsimnyog Paub (Note):**

Lolus “**vajntxwv**” no yog hais txog tus vajntxwv uas nws kav ntau ntau lub tebchaws thiab ntau ntau tus fuabtais. Xwsli, vajntxwv Xisxas. Lus Mekas yog “**emperor**.”  
Lolus “**fuabtais**” no yog siv rau tus fuabtais uas nws kav nws lub tebchaws xwb. Lus Mekas yog “**king**.”

## • Cov Nqelus Tseemceeb Ntawm Txoj Kevntseeg •

### Nqelus 1: Hais Txog Vajtswv

**1]** Peb cov pawgntseeg puavleej koomsiab thiab qhia rawsli cov lus hauv lub Rooj Sablaj Kevntseeg nyobrau lub nroog Naixias tau hais tseg xwb: tseeb tiag tsuas muaj tib tug Vajtswv xwb, tiamsis muaj peb leeg: thiab qhov no yuavtsum ntseeg tsis muaj qhov khuamsiab dabtsi hlo li. **2]** Losis muab hais dua lwm lolus, tsuas muaj tib leeg uas yog tus Tswv xwb, uas yog hu ua Vajtswv thiab Nws yog Vajtswv tus tseeb. Nws yog tus nyob mus ibtxhis, tsis muaj lub cev uas yog nqaij-tawv, Nws muaj hwjchim loj dua ntais, Nws muaj tswvyim, thiab Nws yog tus zoo kawgnkaus. Nws yog tus tsim txhua yam thiab yog tus tswj thiab ceev txhua yam kom nyob ruaj tsis hais tej uas qhovmuag pom thiab qhovmuag tsis pom huv tibi. **3]** Vajtswv yeej tsuas muaj tib leeg xwb tiamsis muaj peb leeg — xwsli Vajtswv Leejtxiv, Vajtswv Leejtub, thiab Vajtswv uas yog Vaj Ntsujplig. Lawv yog tib tug Vajtswv, lawv muaj hwjchim sibluag zos, thiab lawv muaj meejmom sibluag zos mus ibtxhis. Peb siv lolus tib tug losis tib leeg ibyam li cov ntseeg tiam thaum ub siv. **4]** Lolus uas hais tias, “tib tug *losis* tib leeg” tsis yog hais txog tej yam uas zooli ib tug tibneeg losis ib tug tibneeg tus yamntxwv. Tiamsis lolus uas hais tias, “tib tug *losis* tib leeg” no yog hais txog qhov uas Nws yeej yog Vajtswv thiab Nws yeej ibtxwm muaj nyob uas txawv li tibneeg ntiajteb.

**5]** Peb cov pawgntseeg tsis pomzoo nrog cov uas qhia cuav, xwsli, cov Manis-tshis (*Manicheans*) uas tau qhia hais tias muaj ob tug Vajtswv, ib tug zoo hos ib tug phem. Peb kuj tsis pomzoo nrog cov Veli-thinias, cov As-lias, cov Yunau-mias, cov Muvxalees, (*Velentinians, Arians, Eunomians, Muslims*), thiab lwm tus uas qhia zoo ibyam li cov no. **6]** Peb kuj tsis pomzoo li cov tiam qub thiab tiam tshiab ntawm cov uas caum tus txivneej lub npe hu ua Phaus uas tuaj ntawm lub nroog Xamauxatas tuaj qhov kevqhia (*Paul of Samosata*). Lawv qhia hais tias tsuas muaj tib tug Vajtswv xwb. Lawv muab lawv lub tswvyim thiab kev txawjntse los cav hais tias lolus “Txojlus” uas yog hais txog [Tswv Yexus] thiab lolus “Vaj Ntsujplig Dawbhuv” no tsis tau cais hais tias yog muaj Tswv Yexus thiab muaj Vaj Ntsujplig Dawbhuv, tiamsis lolus “Txojlus” no tsuas yog hais txog tej lolus uas zoo ibyam li tibneeg tej lus xwb. Thiab lolus “Vaj Ntsujplig” no tsuas yog hais txog tej uas txawj nti thiab txawj txav nyobrau hauv txhua yam uas Vajtswv tau tsim tseg lawm xwb.

### Nqelus 2: Hais Txog Kevtxhaum Nruab-thiab (kevntxhaum ntawm roj-tshav)

**1]** Peb cov pawgntseeg kuj qhia hais tias txij thaum Adas poob rau kevtxhaum lawm, txhua tus neeg uas yug los ntawm sab nqaij-tawv rawsli tibneeg ntiajteb yug puavleej yug los nrog txoj kevtxhaum ntawm roj-ntsha. Qhov no yog qhov uas hais txog neeg yug los muaj kevtxhaum uas neeg yeej tsis paub ntshai Vajtswv, tsis paub ntseeg Vajtswv, thiab muaj lub siab nyiam qhov phem. **2]** Tus kabmob losis qhov kevtxhaum nruab-thiab no, tseeb tiag yeej yog kevtxhaum. Vim txoj kevtxhaum no yeej yuav coj kev txiavtxim los rau txhua tus uas tsis tau yug dua tshiab los ntawm kev ua Npavtivxamas thiab Vaj Ntsujplig (losis kevcai ntxuav).

**3]** Peb cov pawgntseeg tsis pomzoo nrog cov uas caum Phalenkis-av (*Pelagius*) thiab lwm tus uas tsis kam lees txoj kevtxhaum nruab-thiab no. Cov neeg no lawv cav hais tias neeg muaj peevxwm ua kom neeg ncaincees tau rau ntawm Vajtswv los ntawm lawv qhov peevxwm thiab lawv lub zog. Qhov qhia lino yog cojlos rhuav tshem qhov uas Tswv Yexus los tuag txhiv tibneeg lub txim lawm.

### **Nqelus 3: Hais Txog Vajtswv Leejtub**

**1]** Peb cov pawgntseeg qhia hais tias qhov uas Vajtswv Txojlus hais tias “Txojlus losis Lolus” ntawd yog Vajtswv Leejtub, Nws tau los yug ua neeg los ntawm nkaujxwb Maivliag. **2]** Yog li ntawd, Tswv Yexus Nws thiaj yog Vajtswv thiab Nws yog neeg. Qhov uas Tswv Yexus yog Vajtswv thiab yog neeg ntawd nyob uake thiab muab sibfaib tsis tau. Yog li ntawd Nws yog tib tug Khetos, uas yog Vajtswv thiab yog neeg uake, uas tau los yug rau ntawm nkaujxwb Maivliag. Nws tau raug kev tsimtxom, raug ntsia, tuag, thiab muab faus. **3]** Nws raug txhua yam no kom Nws thiaj li coj peb rovlos cuag tau Vajtswv Leejtxiv, thiab Nws txoj kevtuag ntawd tsis yog theej peb dim ntawm qhov kevtxhaum nruab-thiab xwb, tiamsis tseem theej peb dim ntawm txhua yam kevtxhaum huv tibi. **4]** “Txojlus losis Lolus” (*The Word*) uas yog Tswv Yexus ntawd, tau nqis mus hauv tubtuag teb, thiab tau sawv rovlos ntawm hnub peb lawm. Tomqab ntawd Nws tau nce mus saum ceebtsheej thiab zaum ntawm Leejtxiv sab tesxis. Nws yog tus kav txhua yam mus ibtxhis thiab muaj lub hwjchim loj dua ntais txhua yam uas tau tsim tseg, thiab Nws ua kom txhua tus uas ntseeg Nws dawbhuv. **5]** Nws tau tso Vaj Ntsujplig los rauhauv neeg lub siab los kav cov uas ntseeg Nws, txhawb cov ntseeg lub zog, thiab ua kom cov ntseeg muaj txojtsia, thiab Nws pab kom cov ntseeg kovyeej dab ntxwngnyoog, thiab txoj kevtxhaum lub hwjchim.

**6]** Tswv Yexus yuav rovqab los rauhauv ntiajteb los txiavtxim rau cov uas tseem ciajsia thiab cov uas twb tuag lawm, rawsli cov Tubtxib Tej Lus Ntseeg tau hais tseg lawm.

### **Nqelus 4: Hais Txog Qhov Uas Vajtswv Ua Kom Peb Dawbhuv**

**1]** Peb cov pawgntseeg qhia hais tias, neeg yeej ua tsis tau kom neeg dawbhuv los ntawm neeg lub peevxwm thiab neeg tes haujlwm zoo rau ntawm Vajtswv ibzaug. Tiamsis qhov uas neeg yuav dawbhuv tau ntawd yog qhov uas Tswv Yexus ntxuav kom lawv dawbhuv los ntawm txoj kevntseeg xwb thiaj tau. **2]** Dawbhuv los ntawm txoj kevntseeg mas peb ntseeg lino: thaum neeg ntseeg Tswv Yexus lawm lawv tau raug txais los rau ntawm Vajtswv thiab tau raug zamtxim los ntawm Tswv Yexus cov ntshav lawm. Vim rauqhov Tswv Yexus txoj kevtuag ntawd yog qhov uas Nws tau them peb tej nuj nqi ntawm txoj kevtxhaum lawm. **3]** Yog li ntawd Vajtswv thiaj li saib cov neeg uas muaj txoj kevntseeg rau ntawm Tswv Yexus yog neeg ncaincees rau ntawm Vajtswv lawm (Loos 3 thiab 4).

## **Nqelus 5: Hais Txog Vajtswv Tes Haujlwm**

**1]** Vajtswv tau tsimtsa muaj tes haujlwm uas qhia Txoj Moozoo thiab kev coj tej kevcai dawbhuv, xwvli Npavtivxamas (kevcai ntxuav) thiab Tswv Yexus Pluashmo. Vajtswv muab Vaj Ntsujplig Dawbhuv rau neeg los ntawm Nws Txojlus thiab tej kevcai dawbhuv no, Vajtswv ua haujlwm nyobrau tej kevcai dawbhuv no kom peb muaj kevntseeg.

**2]** Thaumtwg thiab thaj chaw twg uas Vajtswv pomzoo, Vajtswv tes haujlwm no chiv kevntseeg rauhav cov neeg uas hnov Txoj Moozoo lub siab. **3]** Txoj Moozoo ntawd yog lino: tsis yog peb tibneeg dim thiab raug zamtxim los ntawm tibneeg tes haujlwm zoo, tiamsis yog Tswv Yexus tes haujlwm uas dawbhuv thiab Nws tuag theej neeg xwb. Vajtswv ua kom cov neeg uas ntseeg dawbhuv thiab Vajtswv tsis suav lawv lub txim lawm vim qhov uas Tswv Yexus tuag theej lawv lub txim lawm xwb. **4]** Peb tsis pomzoo nrog cov Anas-npattiv (*Anabaptists*) thiab lwm pawg txog qhov uas lawv ntseeg hais tias neeg yuav tau txais Vaj Ntsujplig Dawbhuv ntawd tsis tas yog los ntawm Vajtswv Txojlus los, tiamsis yog los ntawm lawv kev npaj lawv tuskheej, lawv tej kevjav, thiab tej uas lawv ua xwb yeej tau txais Vaj Ntsujplig Dawbhuv lawm.

## **Nqelus 6: Hais Txog Qhov Kev Mloog Lus Tshiab**

**1]** Peb qhia hais tias txoj kevntseeg yuavtsum tawgpaj txi-txiv thiab yuavtsum ua lub neej zoo rawvli Vajtswv hais kom peb ua, thiab kom rawvli Vajtswv dejsiab. Txawm li ntawd los, peb yuavtsum tsis txhob muab qhov kev ua zoo ntawd los khav rau Vajtswv hais tias vim peb ua zoo peb thiaj tau txais qhov kev zamtxim ntawd los ntawm Vajtswv.

**2]** Vim qhov uas peb tau txais kev zamtxim thiab ua kom peb dawbhuv tau ntawd tsuas yog los ntawm txoj kevntseeg Tswv Yexus xwb. Tswv Yexus hais tias, “Thaum nej twb ua txhua yam lawm .... los nej yuavtsum hais tias, ‘Peb yog cov tubqhe uas tsis tsimnyog rau ntawm koj li tus Tswv ’” (Lukas 17:10). Cov pawgntseeg thawj tiam los kuj qhia ibyam lino. **3]** As-nplov (*Ambrose*) tau hais tias, “Vajtswv tau hais tias, tus uas ntseeg Tswv Yexus, tus ntawd tau txais txojkev zamtxim dawb dawb xwb. Nws dim tsis yog vim nws ua zoo, tiamsis yog vim nws txoj kevntseeg xwb.”

## **Nqelus 7: Hais Txog Pawgntseeg**

**1]** Peb cov pawgntseeg qhia hais tias tsuas muaj tib pawgntseeg dawbhuv xwb thiab tseem yuav muaj nyob ntxiv mus lawm tomntej. Pawgntseeg dawbhuv ntawd yog txhua tus ntseeg Tswv Yexus uas qhia thiab coj Txojlus tseeb los zwm ua ibke nyobrau hauv. Cov ntseeg uas nyobrau hauv pawgntseeg dawbhuv no lawv qhia Txoj Moozoo tseeb thiab lawv coj tej kevcai dawbhuv uas yog npavtivxamas (kevcai ntxuav) thiab Tswv Yexus Pluashmo rawvli Vajtswv Txojlus qhia. **2]** Qhov uas pawgntseeg yuav koom tau ib lub siab ntawd yog qhov uas sawvdaws pomzoo qhia rawvli Vajtswv Txojlus tseeb thiab coj tej kevcai dawbhuv (npavtivxamas thiab Tswv Yexus Pluashmo) ntawd kom rawvli Vajtswv Txojlus qhia. **3]** Tej uas neeg ibtxwm coj, neeg tej kevcai thiab tej kevcoj hauv pawgntseeg ntawd tsis tas yuavtsum coj zoo tibyam nyobrau txhua txhua thaj chaw losis txhua txhua pawgntseeg. **4]** Tiamsis qhov tseemceeb yog qhov uas Povlauj tau hais tias, “Nej raug hu los koom tib lub cev, tib tug Ntsujplig, tib txojkev vam, tib tug Tswv, tib txog kevntseeg,, tib qhov npavtivxamas, tib tug Vajtswv thiab Leejtxiv ntawm txhua yam” (Efexaus 4:4-6).

## **Nqelus 8: Hais Txog Pawgntseeg Yog Dabtsi**

**1]** Pawgntseeg yog qhov uas cov ntseeg tseeb txhua tus tuaj sau ua ibke. Tabsis nyobrau lub ntiajteb no muaj ntau leej uas lam ris lub npe ntseeg thiab ntau leej uas yog neeg phem tseem tuaj koom xyaw cov ntseeg tseeb uake. Vim yog lino, muaj ntau lub sijhawm peb tau txais tej kevcai dawbhuv los ntawm cov neeg phem uas ua txuj ua li tus ntseeg los kuj muaj. Ib yam li Tswv Yexus tau hais tseg tias, “Cov xibfwb qhia Vajtxwv Txojlus thiab cov neeg Falixais zaum saum Mauxes lub rooj.” (Mathais 23:2). **2]** Vajtswv Txojlus thiab tej kevcai dawbhuv no yeej ua kom tshwm qhov muaj nuj nqi tuaj tau vim Tswv Yexus yog tus tsimtsa kom muaj thiab hais rau peb kom peb siv thiab ua rawsli Nws tau hais tseg. Yog lino, txawm tej thaum tej neeg phem yog cov uas muab thiab ua tej kevcai dawbhuv no los, yam uas Vajtswv coglus nyobrau hauv cov kevcai dawbhuv no yeej yuav tshwm muaj rawsli Vajtswv cov lus ntawd.

**3]** Peb tsis pomzoo nrog cov Daunativ (*Donatists*), thiab lwm pab uas coj li lawv qhia. Lawv qhia hais tias yog cov ntseeg mus txais tej kevcai dawbhuv ntawm cov neeg phem uas nyobhauv pawgntseeg, qhov ntawd yog ib qhov txhaum, thiab qhov uas cov neeg phem ntawd coj tej kevcai dawbhuv nyobhauv pawgntseeg ua rau tej kevcai dawbhuv ntawd tsis muaj hwjchim dabtsi li lawm.

## **Nqelus 9: Hais Txog Npaktivxamas (kevcai ntxuav)**

**1]** Peb cov pawgntseeg qhia hais tias kev npaktivxamas ntawd nws tseemceeb rau txojkev dimtxim, **2]** thiab los ntawm kev ua npaktivxamas ntawd Vajtswv muab Nws txoj kevhlub rau peb. Yog li menyuam los yuavtsum ua npaktivxamas ibyam. Cov uas los ua npaktivxamas ntawd thiaj li raug cojlos nkag rau Vajtswv txoj kevhlub xwb.

**3]** Peb tsis pomzoo nrog cov Anas-npaktiv (*Anabaptists*), uas qhia hais tias kev ua npaktivxamas rau menyuam ntawd siv tsis tau, vim menyuam yeej ciali dim uas tsis tas ua npaktivxamas li.

## **Nqelus 10: Hais Txog Tswv Yexus Pluashmo**

**1]** Peb cov pawgntseeg qhia hais tias Tswv Yexus lub cev thiab cov ntshav muaj nyobrau hauv lub ncuav ci thiab cov cawv txivhmab ntawd, thiab thaum peb muab rau cov ntseeg, yog peb muab Tswv Yexus lub cev thiab Nws cov ntshav rau cov uas txais, thiab txhua tus uas txais lawm muaj kev zamtxim nyobrau ntawm kev koom nrog Tswv Yexus Pluasmo ntawd. **2]** Peb tsis pomzoo nrog txhua tus uas qhia txawv qhov no.

## **Nqelus 11: Hais Txog Kev Leestxim Ntawm Tus Ntseeg Lub Neej Txhua Hnub**

**1]** Peb cov pawgntseeg qhia hais tias kev leestxim thiab kev zamtxim nyobrau hauv lub tuamtsev yuavtsum muaj thiab txhob muab tso tseg li. Thaum peb leestxim ntawd tsis tau txhais hais tias kom peb lees ib qho txim zuzuj. **2]** Vim peb yeej tsis paub hais tias peb tej kevtxhaum muaj ntau npaum licas. Zoo ibyam li tus sau Phau Ntawv Nkauj hais tias, “Leejtwg thiaj yuav paub nws tej kevtxhaum txhua thxua qhov huv tibi?”

## **Nqelus 12: Hais Txog Kev Los Leestxim thiab Hloov Dua Siab Tshiab**

**1]** Peb cov pawgntseeg qhia lino hais tias cov uas twb los ntseeg thiab ua npavtivxamas lawm tiamsis lawv rovqab thim losis poob kevntseeg lawm, yog thaum twg lawv rovlos lees kevtxhaum los yeej tseem muaj txojkev zamtxim rau lawv. **2]** Pawgntseeg tsimnyog tshajtawm txojkev zamtxim rau tus neeg ntawd yog thaum twg nws tig rovlos. Kev lees kevtxhaum losis hloov dua siab tshiab ntawd muaj ob qho: **3]** Qhov ib, yog hais txog tus uas twb ntseeg lawm mus uatxhaum rovlos leestxim. Qhov no nws yuavtsum paub nyuajsiab rau nws txoj kevtxhaum. Qhov no yog qhov uas yus lub siab muaj txoj kevntshai vim rauqhov yus ua txhaum lawm. **4]** Qhov ob, yog hais txog tus neeg uas tsis tau ntseeg. Tus neeg no yuavtsum tau los yug dua tshiab ntawm Txoj Moozoo thiab leestxim kom nws tau txais kev zamtxim, **5]** thiab ntseeg hais tias txoj kevtxhaum raug zam los ntawm Tswv Yexus. **6]** Qhov kev lees kevtxhaum losis hloov dua siab tshiab no tshem txojkev ntshai tawm thiab koj txojkev kajsiab los. Dhau li ntawd lawm, tus ntseeg mus uatxhaum uas rovlos leestxim ntawd yuavtsum muaj lub neej zoo tshwm tuaj rau sabnraud qhia hais tias nws yeej hloov dua siab tshiab lawm tiag, vim rauqhov lub neej zoo ntawd qhia hais tias yus leestxim tiag tiag lawm. Ibyam li Yauhas tau hais tseg hais tias, “Ua koj lub neej qhia hais tias koj yeej leestxim thiab tig rovlos cuag Vajtswv lawm.” (Mathais 3:8)

**7]** Peb tsis pomzoo nrog cov Anas-npaktiv (*Anabaptists*) uas qhia hais tias cov uas twb los ntseeg thiab tau txais kev zamtxim lawm tsis muaj hnuv uas lawv yuav plam txojkev dimtxim losis plam Vaj Ntsujplig Dawbhuv ibzaug li lawm. Thiab peb kuj tsis pomzoo nrog cov uas qhia hais tias muaj ib txhia neeg mas lawv yeej muaj peevxwm ua tau lub neej uas tsis muaj ib qhov yuamkev li nyobrau hauv lub neej ntiajteb no. **8]** Lawv qhia hais tias cov neeg uas zoo lino lawv tsis txawj uatxhaum li lawm.

**9]** Peb los kuj tsis pomzoo nrog cov Navathias (*Novatians*) uas qhia hais tias lawv yuav tsis muaj kev zamtxim rau cov uas twb ua npavtivxamas lawm tiamsis tomqab ntawd ho poob kevntseeg losis mus uatxhaum, txawm yog cov neeg ntawd rovlos leestxim los xij.

**10]** Peb kuj tsis pomzoo nrog cov uas qhia hais tias txojkev zamtxim ntawd tsis yog Vajtswv zam rau peb vim los ntawm kevntseeg, tiamsis yog los ntawm kev ua zoo ces Vajtswv mam muab kev zamtxim rau peb xwb.

## **Nqelus 13: Hais Txog Tej Kevcai Dawbhuv**

**1]** Peb cov pawgntseeg qhia hais tias kev ua npavtivxamas (kevcai ntxuav) thiab koom Tswv Yexus Pluashmo ntawd yog teeb muaj los kom cais tau hais tias tus ntseeg twg losis pab pawgntseeg twg txoj kevntseeg zoo lincas. Dhau lino, tej kevcai dawbhuv no kuj yog tus cim thiab yog Vajtswv txoj koobhmoov ntawm Nws li dejsiab uas Nws muaj rau peb. **2]** Thiab tej kevcai dawbhuv no yog muaj los pab kom cov uas ntseeg lawm muaj kev ntseeg ruaj khov tuaj yog thaum lawv ua thiab koom ob yam no lawm. Yog li ntawd peb thiaj li yuavtsum ua thiab muaj tej kevcai dawbhuv no los pab peb txoj kevntseeg thiab kom peb muaj kev ruajsiab rau Vajtswv tej lus cogtseg ntawd.